

二、《雜阿含經》卷38(1073經)(CBETA, T02, no. 99, p. 278, c8-p. 279, a11):

如是我聞:

一時, 佛住舍衛國祇樹給孤獨園。

爾時, 尊者阿難獨一靜處, 作是思惟:「有三種香, 順風而熏, 不能逆風。何等為三? 謂根香、莖香、華香。或復有香, 順風熏, 亦逆風熏, 亦順風逆風熏耶?」作是念已, 晡時從禪覺, 往詣佛所, 稽首佛足, 退住一面, 白佛言:「世尊! 我獨一靜處, 作是思惟:『有三種香, 順風而熏, 不能逆風。何等為三? 謂根香、莖香、華香。或復有香, 順風熏、逆風熏, 亦順風逆風熏耶?』」

佛告阿難:「如是! 如是! 有三種香, 順風熏, 不能逆風, 謂根香、莖香、華香。阿難! 亦有香, 順風熏、逆風熏、順風逆風熏。阿難! 順風熏、逆風熏、順風逆風熏者, 阿難! 有善男子、善女人, 在所城邑、聚落, 成就真實法, 盡形壽不殺生、不偷盜、不邪淫、不妄語、不飲酒。如是善男子、善女人, 八方上下, 崇善士夫, 無不稱歎言:『某方某聚落善男子、善女人, 持戒清淨, 成真實法, 盡形壽不殺, 乃至不飲酒。』阿難! 是名有香順風熏、逆風熏、順風逆風熏。」

爾時, 世尊即說偈言:

「非根莖華香, 能逆風而熏, 唯有善士女, 持戒清淨香。

逆順滿諸方, 無不普聞知, 多迦羅栴檀, 優鉢羅末利。

如是比諸香, 戒香最為上, 栴檀等諸香, 所熏少分限。

唯有戒德香, 流熏上昇天, 斯等淨戒香, 不放逸正受。

正智等解脫, 魔道莫能入, 是名安隱道, 是道則清淨。

正向妙禪定，斷諸魔結縛。」

佛說此經已，尊者阿難聞佛所說，歡喜隨喜，作禮而去。